

**Kinguaassiuutitigut atornerluisoqarsimatillugu ilaqutariit eqqugaasut ataatsimoortillugit avissaartinnagit piffinni katsorsartittalernissaat anguniarlugu qanoq iliuseqartoqarsinnaanera pillugu inatsisartut oqallisiginissaannut siunnersuut.**  
(Inatsisartunut ilaasorta, Jess Svane, Siumut)

### **Akissuteqaat**

(Peqqissutsimut, Isumaginninnermut Inatsisinillu Atuutsitsinnermut Naalakkersuisoq)

Apeqquteqaat aallaavigalugu oqallisissiamut saqqummiunneqartumut Naalakkersuit qujapput.

Meeqqat kinguaassiuutitigut atornerlunneqarsimasut pitsaanerpaamik katsorsarneqarnissaannik qulakkeerinnittoqartariaqartoq Naalakkersuisut siunnersuuteqartoq assigalugu isumaqarput. Katsorsaaneq aamma siamasissuussasoq Naalakkersuisut isumaqarput. Tassa imaappoq kinguaassiuutitigut atornerlunneqarsimasoq, piffinni inuiaqatigiit, qanigisaasut inuillu kinguaassiuutitigut kannguttaatsuliornermik pissusilersortartut katsorsaanermi eqqarsaatigineqassapput.

Taamaattumik taakkununga atatillugu Naalakkersuisut sulianik assigiinngitsunik aallartitsipput. Inersimasunut kinguaassiuutitigut atornerlugaanerup kingunerisaanik kingunerlutsitsisunut katsorsaasunik angalaqatigiittartoqarpoq kiisalu aamma meeqqanut angalaqatigiittartoqarluni, taakkua meeqqat kinguaassiuutitigut atornerlunneqarsimasut sumiiffinni najugaanni katsorsartarpaat. Meeqqanut angalaqatigiittartut pisariaqartoqartillugu ilaqutariit tamakkerlugit sullittarpaat. Tassa imaappoq, meeqqat katsorsarneqartut ilaqtaminniit, ilisarimasaminniit toqqissisimaffimminiillu aallarunneqaratik katsorsarneqartarput. Taakkua saniatigut ilaqutariinnut sullissiveqarpoq, tassani ilaqutariit tamakkiisumik ukkatarineqarput aamma ilaatigut ilaqutariinni meeqqat kinguaassiuutitigut atornerlunneqarsimatillugit tassani katsorsarneqartarlutik.

Naalakkersuisut kinguaassiuutitigut atornerluineq akiorniarlugu periusissiaat, Killiliisa, aqputigalugu atornerlunneqarsimasut ilaquataasullu katsorsarneqarnissaat ukkatarineqarpoq. Inuit sumiikkaluarunilluunniit katsorsarneqarnissamik pisariaqartitsisut ikiorneqarsinnaasat siunertarineqarpoq. Katsorsaannerit taamaalillutik piffinni ataqatigiinnerit aallaavigalugit nalimmassarneqassapput, aammalu piffinni periarfissat akornutissallu apeqqutaatillugit assigiinngitsunik iluseqarsinnaallutik. Tamatuma peqatigisaanik Killiliisa aqputigalugu, nutaaliornertut, inuit kinguaassiuutitigut kannguttaatsuliornermik pissusilersortartut katsorsarneqarnissaat aamma ukkatarineqarpoq. Ukkatarisassatullu suliassaq tamanna pingaaruteqarluinnarpoq, tassami siunissami kinguaassiuutitigut atornerluinissat ingerlaavartumilluunniit atornerluisarnerit pitsaaliorneqassapput. Siusinnerusukkut inuit kinguaassiuutitigut kannguttaatsuliornermik pissusilersortartut katsorsarneqarnerisigut siunissami allanut kinguaassiuutitigut kannguttaatsuliorsinnaanerannut aarlerinartoqarnera annikillisinneqartartoq ilisimaneqarpoq.

Inuit kinguaassiuutitigut kannguttaatsuliornermik pissusilersortartut katsorsarneqarnissaat Naalakkersuisut pitsaaliuinnermik ukkataqarnerannik erseqqissaasuvoq. Isumaginninnermik Aqutsisoqarfimmi suliniutini arlalinni pitsaaliuineq pingaartillugu qitiutinneqarpoq, taakkununga ilaapput Killiliisa aamma MANU, taakku marluullutik ilaqutariinnut sammitinneqarput.

Ilaqutariit ataatsimoorfittut nukittunerpaatut pigisaraarput, Naalakkersuisullu ilaqutariinnerup pingaaruteqassusaa ilisimaaraarput. Ilaqutariit iluini meeqqamik kinguaassiuutitigut atonerluisoqarsimatillugu tamanna aamma atuuppoq. Naalakkersuisut ilaqutariinnut politikkimik suliaqarput. Meeqqanut inuusuttunullu suliniutit, ilaqutariit ataatsimut aallaavigalugit ingerlanneqassasut politikikkut ilaatigut qulakkeerneqassaaq. Tamatuma kingunerissavaa ilaqutariit ataatsimoortut isiginiarlugit aallaavigalugillu isumaginninnermut suliassa qarfimmi suliniutit ingerlanneqassasut. Meeraq kinguaassiuutitigut atonerlunneqarsimatillugu suliniutit meeqqamut qanigisaasut meearlumi aallaavigalugit ingerlanneqassasut taamaammat siunertarineqarpoq.

Siunnersuuteqartoq assigalugu suliassa qarfiup pingaaruteqarnera Naalakkersuisut isumaqatigilluinnarpaat. Meeqqat kinguaassiuutitigut atonerlunneqarsimasut ikiorserneqarnissaat katsorsaariaaseq piffissarlu naapertuuttoq atorlugit ingerlanneqassapput.

Sulisunik pissarsiniarneq attassiinnarniarnerlu unammilligassaasoq oqallinnermi uani takkuisoorneqarsinnaanngitsoq pingaaruteqarpoq uparuassallugu. Unammilligassap taassuma suliniarneq ajornakusoortittarpaa.

Naalakkersuisut taamatut oqaaseqarlutik kinguneqarluartumik pitsaasumillu oqallittoqarnissaa qilanaarutigaa.